

古典文學 第一名 江曉輝 筆名/香江不肖生

個人簡介：清華大學中國文學系博士六年級

學士、碩士畢業於國立中山大學，香港僑生，曾獲獎項：

- (香港)第 31 屆青年文學獎徵文比賽新詩高級組亞軍及優異獎
- (香港)第 32 屆青年文學獎徵文比賽新詩高級組優異獎
- (香港)第 33 屆青年文學獎徵文比賽新詩高級組優異獎
- (香港)第 34 屆青年文學獎徵文比賽新詩高級組冠軍及優異獎
- (臺灣)第一屆「曉境雲聲」古典詩歌創作比賽七言律詩組第五名
- (臺灣)第 17 屆西子灣文學獎古典詩詞組貳獎
- (粵港澳臺)第 3 屆粵港澳臺大學生詩詞大賽詩組季軍
- (臺灣)第 18 屆西子灣文學獎古典詩詞組貳獎
- (臺灣)第 19 屆西子灣文學獎古典詩詞組參獎、現代詩組首獎
- (臺灣)第 20 屆西子灣文學獎古典詩詞組首獎
- (臺灣)第 21 屆西子灣文學獎古典詩詞組首獎、古典詞組參獎
- (臺灣)第 29 屆中興湖文學獎全國徵文比賽古典文學類第二名
- (臺灣)第 30 屆中興湖文學獎全國徵文比賽古典文學類第三名
- (臺灣)第 31 屆中興湖文學獎全國徵文比賽古典文學類第二名
- (臺灣)第 32 屆中興湖文學獎全國徵文比賽古典文學類第一名
- (臺灣)第 33 屆中興湖文學獎全國徵文比賽古典文學類第一名
- (臺灣)第 34 屆中興湖文學獎全國徵文比賽古典文學類第二名
- (臺灣)第 35 屆中興湖文學獎全國徵文比賽古典文學類第一名
- (臺灣)第 36 屆中興湖文學獎全國徵文比賽古典文學類第一名

己亥落花詩

百載風雲一紫荊，推移世運有枯榮。
枝垂綠玉終非實，劫似紅羊已落英。
逐水浮花春漠漠，沉泥香骨恨明明。
當年名冠群芳譜，海遠天荒未了情。

淚盡包胥復楚荊，我祈青帝續寒榮。
應憐花海如愁海，獨出林英是紫英。
屏翳何期收雨瘴？羲和久未吐晴明。
願將根葉移仙界，為信諸天覺有情。

澤畔蕭茅野外荊，庭中滋蔓勢驕榮。
德違仁厚非蘭蕙，跡近卑庸豈若英。
惡草炎炎猶僭雜，香魂裊裊未分明。

花神十二同垂淚，不信東君不動情。

流年火宅痛焚荊，枯木何能雨後榮？
欲問維摩求善法，空承天女散香英。
金輪轉劫愁難盡，世鏡蒙塵暗不明。
我病還如眾生病，落花盈抱未忘情。

狂秦虎暴陷西荊，眇莽東遷失舊榮。
心怛傷兮思故木，民離散矣落飛英。
愁知板蕩今猶古，久待元運晦復明。
最是楚辭難卒讀，一篇哀郢慟離情。

中秋問月

陰陽精氣生兩眸，代天巡睃照九幽。潛形變怪夜多事，明察之責爾其尤。嗟爾枉為天眼目，妖蠱何故眼中宿？噬精蝕魄減清輝，幾時散盡浮雲覆？是夜何不來相照？餘光或可破迷蒙。抑爾人間祿利亦迷眼，是非不辨瞽無功？嗚呼！人天愁永隔，精血已化碧。生者亦支離，冤讎事不白。中秋今夕月虛懸，萬家扞格未團圓。何期一洗萬古眼，洞徹螭魅罔兩影，霄光重照窈冥天？

招魂

奏曰：

時維己亥桂月初生霸，地在太子車站森九冥。人乃手無寸刃之百姓，事係折肢斷頸之虐刑。既執義以身殉，復拘迫於囹圄。豈上帝已瞽聵？奚蒼天已無靈？賞姦邪而罰善，何垂教以常經？乃碎首以叩闔，祈退惡兮開幽局。

招曰：

魂兮歸來！無隨風兮飄消。雖無衣兮升屋，有黑旗兮魂招。循燭光以返兮，靈歆蒸兮甘饒。眾掩涕以盼兮，悼歌發而變調。厲魂魄以報雪兮，洗爾冤兮昭昭。

己亥新樂府

黃雀行

林中有黃雀，高棲共晏時。一夕颯風起，驚飛忽參差。弋者彈丸急，放圍羅網施。同群紛落羽，竄突痛支離。幸得仁義士，決網救雛危。孤飛去不返，投止遠潢池。啾啾頻回顧，飲啄非舊姿。託庇新林下，終復戀南枝。

苦蝨行

萬類氣性賦陰陽，正則坦蕩邪則藏。有物襲此邪猥氣，託體卑穢入我床。中夜

輾轉非思服，萬頭鑽蓆驚鬼族。血腹如鼓齒留痕，我非如來豈割肉？癢在肌骨若生根，跳突不異行者孫。搔背安得麻姑手，放狂欲去阮籍禪。擬尋敵踪難尋見，遁潛直如地道戰。以一敵百剿匪難，左支右絀誰可薦？防蚊猶能青帳懸，一蟲螫起勢成千。金仙惶惶愁天劫，奇癢真可壞四禪。豈效荊公任爾蝨，爾非蜂蝶我非蜜。也知魔長道必消，困獸還須鬥一室。怒來火刑復水刑，抖落群魔如落星。掀天揭地差一着，風雷終不破敵營。高祖有痣七十二，點檢吾軀亦有似。世人眼目驚斑斕，君子豹變吾其類。

瘟疫行

拳匪亂後兩甲子，凶年運從五黃始。獸嚎聲並刀砧聲，虎齒豹尾怒還喜。武昌魚膾豈足珍，黃鶴剔骨吮鳳髓。真武座前酒肉香，龜蛇滋味雜一簋。窮山盡水搜毛鱗，以食為天民之旨。封城已陷業雲深，生門隔斷布嚴疊。禽魂獸魄疫鬼行，絕煙熄炊空衢市。避之竄散如驚鴉，遇之僵踣呼不起。下瞞上欺禍四鄰，亡羊難堵毒流徙。南柯一夢何必醒，草頭百姓無虞死。